



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

Pakistan: Quetta kubok railway station ka nung nisung 25 pokset

Harmanpreet-i Men's FIH Player of the year award nguogo



VOL. XXII ISSUE NO. 32 (ADOK 32)

DIMAPUR

AMUNGNÜ (SUNDAY)

YIMPOKSÜI (NOVEMBER) 10, 2024

₹ 5.00

Purvottar Janajati Shiksha Samiti NE-i academic assembly ayongzük

Kohima, November 9, 2024 (TYO): Purvottar Janajati Shiksha Samiti, North East-i Honibarnü "Challenges to the implementation of National Education Policy (NEP) 2020" omen nung ajemdaker academic assembly ka den Krishna Chandra Gandhi Award 2024 sentong ayongzuka agiogo.

Capital Convention Centre Kohima nung agiba sentong nung tongti tesemdangjeri Higher Education & Tourism Minister Temjen Imna Along liasü.

"Nübertem mesüra linük ka tia melentsü atema education system dak alaka tanga system kecha mali. Alemlü nungi meimchirtemi shisatsü angutsü meranga arur" ta Imna Along-i ashi.

National Education Policy 2020 mapa kuma tenzüksüla aser NEP 2020 mezüing benoka jembidango Nagaland nung alirtemi ola adok aser iba ya mapa kuma inyakra nübertem Hindu nung akümtsü ta bilem, ta pai ashi.

"Iba nung metokmeperi kar lira asenoki jungjunga meshisadanga lir. Metokmeperi lira bangdakpurtem dang NEP 2020 policy ya kechi atema shisatet ta asüngdangtsü tim" ta Minister Along-i ashi.

"Department of School Education, Higher Education aser nübertem den lennirtemi NEP 2020 ya paper nung masü saka asenok dak mapa kuma inyaktsüla. Iba maparen nung nübertem shilem magiram NGOs medenra, tesayuba nung lennirtem medenra sorkar kijai inyaka moutettsü" ta pai metetdaksü.

Asenoki school level nung NEP metenzük tetra kodaser higher education tajungba yanglutettsü. Sorkari ajak nem education agütsütsü meranger saka education system yanglushitsü nungdaker aser iba atema tesayurtemi NEP 2020 tajungba kümdaktsütsüla, ta Imna Along-isa ashi.

Iba sentong nung tongti o jembirji Vidhya Bharati nung National President Dr D Ramkrishna Rao liasü aser pai school tem NEP enabled aser tesayurtem NEP kubok graded asütsü ayongzük.

NEP kubok tesayurtem tashi itdaksüba aser iba policy mapa kuma tenzükba ya sorkar kijai masü saka sendaktepa alir ajaki tebilemtsü khuret abentsüla, ta Dr. Rao-isa ashi.

"Classroom transaction nung learning method ishika dang liasü saka NEP kubok teaching aser learning atema lenmang aika lir" ta paisa shisem.

Iba sentong nung Directorate of School Education Nagaland nung retired Additional Director (H) Zakienei Khoubnem Krishna Chandra Gandhi Award agütsü.

Zakienei-i social service atema bendanga agüja inyakba aser Nagaland nung Hindi oshi atema shilem tajung agiba atema iba sempet agütsü.

Minister Temjen Imna Along den tangartem Piyong Temjen Jamir indang kaket ka sayatsü. Iba kaket ya State Organising Secretary Janjati Shiksha Samiti (Vidhya Bharati) Nagaland, Pankaj Sinha-i züluba lir.

Australia nung tanurtem atema 'Social Media' noktangtsü

New Delhi, November 9, 2024 (Agencies): Australia sorkari arishi kum 16 teküpok tanurtemi social media mamshidaktsütsü atema ozüing ka yangluttsü ta Prime Minister, Anthony Albanese-i metetdaksüogo.

"Social media ajanga asen tanurtem nem lendong bentsür arur anungji sorkari lemtet tajung ka agitsü. Taküm Parliament nung ozüing tasen benoka agizüksü aser iba sülen ita 12 nungi mapa kuma inyaktsü" ta Albanese-i ashi.

Iba tenokdangba ya Meta meyong Instagram aser Facebook, ByteDance meyong TikTok, X (taoba mapang Twitter) aser Alphabet meyong YouTube amala social media sabangtem dena lir.

"Tsüraburtemi mulung nunga temelaba magütsütsü" ta Communications Minister Michelle Rowland-i ashi.

Iba tenokdangba ya social

media temi pei pei sasa inyaktsü. Company temi arishi kum 16 teküpok tanurtemi parnok services mamshitettsüsa meratem agidaktsütsü atema sorkari inyaktsü.

Tanurtem dak social media agi kongshiba ya Australia kijai masü saka linük aikati policies sayaogo mesüra kari tenokdangbatem agütsütsü asoshi policy balala yangludat.

Yaküm France-i arishi kum 15 ser teküpokpur atema iba mesükba tenokdangba agütsüogo.

United States nunga social media sabangtemi tsüraburtem dang nungi temelaba meshiba sülen arishi kum 13 teküpok tanurtem dang nungi data bendener. Iba ajanga sabang aikati arishi kum 13 teküpokpur medendaktsür.

Ajisüaka, Australia-i tang yangluba ozüing ya tesashitaba lir kechiyong iba nung "parental approval" magütsür.

Chakhroma Public Organisation (CPO) kum 150 jungogo



Dimapur, November 9, 2024 (TYO): Chakhroma nungeri Nagaland nung tanga kin aser loktitem parnok litsü nung mulungsoa lidakja arur aser külemi putepa alir ta Chief Minister Neiphiu Rio-i ashi.

Hokolbarnü Chumoükedima nung Chakhroma Public Organisation (CPO) kum 150 ajungba benjungmong nung jembidang "Chakhroma area nung tanga Angami yimdaklirtem aser Naga nung mezüingpurtemi mangdang tulu ayuba ajanga tanü parnoki tajangzüktem agir" ta CM Rio-i ashi.

CPO-i British kettangasür Alexandra Mackenzie-i zülua yutsüba records nung ajemdaker 150 jubilee amonger. Mackenzie-i 1874 nung CPO tenzükba zülua lir aser mezüingbo CPO kubok yimtsüing 17 liasü saka tanübo yimtsüing 44 kumogo.

"Asen oboula nungeri Naga nung ka ama dang alitsü tangatetba atema anibeleva inyak aser asenoki iba tangatetba nung liyonga aotsüla. Chumoükedima district ya temoatsü aliba tesem ka lir kechiyong iba district nung

nisung ajak külemi putepa alir aser tanü putuia nenok tesem nung nisung ajak pelashishia agizüksü mepishir" ta pai ashi.

Nagaland nung lokti tejentibaji CPO asütsü akok kechiyong British kettangasür Captain Butler-i 1874 nung Chakhromah group ta report nung zülua lir. CPO souvenir nung züluloka aliba ya tebang otsü masü saka British nung record nungi züluzükba lir, ta CM Rio-isa ashi.

Chief Minister ka ama pai taoba nung Chakhroma area-i District HQ belentsü merang kechiyong District headquarters nung tarutsü nung renloka aotsü aser ulushitsü atema ali peria alitsü nungdaker. Chumoükedima district nung connectivity tsütsü Shukhovi aser Molvom aser Airport; CISHR amala health care facilities tajung aser NIT, ICFAI University, St Joseph University, Global Open University, North East Christian University amala shisaliok reju tajungtem lir ta paisa ashi.

1860s nung Asaloo nungi Chumoükedima-i British

Administrative headquarter belen aser 1873 nung British Parliament-i asen sobaliba, inyaksangshi aser libaliro kumzuka ayutsü atema Bengal Eastern Frontier Regulation Act agizük, ta Rio-i metetdaksü.

1978 nungi Dimapur nung district ajunga Tribal Belt ta sangdong aser iba ya asen alia ser sobaliba kumzuka ayutsü atema liasü. Village Council Chairmen, GBs aser kin teloktemi sorkar den külemi teka amteper sorkar nükjidongtem atongtsü merangtsüla, ta Rio-isa ayongzük.

Tarutsü putui pei tera aser putiotsü meteta alitsü atema Chumoükedima Village Council den DC office Compound, Chumoükedima anasa Samagooting ta ser state-of-the-art Playground ka yangluttsü jembitepa arudar, ta CM Rio-isa lemsatet.

British nungeri parnok report teimba ka nung Chumoükedima dang Samagooting ta zülua yutsü. Iba ya 1866 nungi 1878 tatemlen ka tashi parnok indang Administrative headquarter liasü aser iba sülen Kohima-i belen, ta paisa metetdaksü.

Advisor Yhome-i NEP-2020 tayongzükbatem lemsatet

Kohima, November 9, 2024 (TYO): Nagaland nung National Education Policy (NEP) 2020 mapa tenzüksüba dena education sector nung tayongzükba jenti lir ta School Education and SCERT Advisor, Kekhrielhoulie Yhome-i ashi.

Academic Assembly ajanga ayongzükba Purvottar Janjati Shiksha Samiti nung Advisor Yhome-i "Challenges to the Implementation of NEP-2020" onük jembidang iba ya lemsatet.

Nagaland nung NEP-2020 tenzüksü asoshi tayongzükba aika lir saka mekoktetsüsabo masü. Nagaland nung school 1939 lir aser iba nung public-private partnerships dena lir. State nung nija school 722 lir aser onoki tawa tu 69 recognize süogo, ta pai ashi.

Sorkar mesüra nija school süang teimba ka urban areas nung lapoka lir aser iba ajanga yimtsüingtem aser meta talang pilar alidak shisaliok rejutem kangabo lapoka mali, ta Advisor Yhome-i ashi.

"Onoki underperforming schools aika shibangtsütsü meranger aser tawa school 107 shibangtsüogo. Sorkarisa school tem lokteptsü aser school karjenjang ajema akümtsü lenmangtem bushiteper" ta paisa ashi.

Nagaland nung school züingtor anenba aser Early Childhood Education tenzükba atema Advisor Yhome-isa lemsatet.

Linük nung school züingtor anener teimbaji Nagaland nung liasü saka tang ibaji aziokdar. Onoki iba anema mapa kar inyakdar aser Early Childhood

Care and Education (ECCE) programs tenzükba state mezüingbuba lir" ta pai ashi.

"Asenok indang official language ji English lir aser asenok ya oshi aika jembiba loktiliba ka lir anungji Hindi ya second language ama benoktsü atema tayongzükba aika lir" ta paisa metetdaksü.

Department-i Hindi sayuba school tem asandangdar aser iba ya jenjang tajungba kümdaktsütsü meranger. Hindi tesayurtem indang qualifications tajungba kümdaktsütsü atema department-i bridge course ka agütsür ta Yhome-isa ashi.

Nagaland sorkari Hindi education nung temulung agüja reju tasen ka lapoktsü sentong lir anungji sendaktepa alirtemi iba maparen nung amaliteap yariteptsü jaoker, ta paisa shisem.

Dimapur Japukong Senso Telongjem hon jubilee mungogo



Changdang Kaketshir telongjemi Jubilee sentong tenzüksüba mapang tangokba noksa nung angur. Noksa nungsa Minister Temjen Imna Along-i o jembiba angur.

Dimapur, Yimpoksüi/ November 9 (TYO): Dimapur Japukong Senso Telongjem tenteter küm 50 ajungba hon Jubilee mung November 9 nü Imliyanger memorial Centre nung kanga meraketa mungogo. Iba sentong ta Molushiba omen nung ajemdaker agia liasü.

Jubilee sentong nung alakteta jaoker ama salem o jembiba mapang Minister, Higher Education & Tourism Temjen Imna Along-i, Küm 50 junga arubaji Tsüngrem temaotsü ta bilemba lemsatop. Paisa, Satsükba nungi Yajang tashi tzükong kübok yimtsüng ajak telongjem nung alitsü merangtsü ayongzüka liasü.

Paisa, tzükong puri Aoer aser Naga nunger atema kechi inyaktetsü aji metettsüla aser talisa kaketshirtem, chirnurtem koba tashi tejakdangi bener

otettsü aji asadangtsüla, ta ashi. Minister-isa, literate dang asüba jagi majungtsü saka educated asütsüla ta ashiba den tetsükdaktsütem kijai makoktsü saka arok longjemer shisadanga inyakba ajanga koktetsü aser Tsüngremi maotsütsü ta ashi.

Sentong nungsa tongti o jembirji Rev. T Chuba liasü aser pai Jubilee omen Molushiba omen nung ajemdaker o jembiba liasü. O jembir-i molushia molushia hon jubilee tongtetba atema iba onük shim ta shia pa o tenzü.

Pai, tanü totzü nungi tenzüker nisung tashi ajak molushia aoba lima ka nung alir ta ashiba den, Laishiba nungi Yob taküm molushia aoba indang tatshitsü bener arua jembiba, shiba tia tensa aika ajangshia aoba sülen moluteta putu pezü tashi lia liasü.

Hon jubilee sentong ya

ketdangpurtem lenisüba nung agi aser mendenbuba k.Longri Imchen-i lokti pela agizükba o jembiba liasü. Sentong nungsa Rev. Dr. Toshi Langu-i anir asür aser lenirtem bilemtetba mapang agi aser ASTD tir Ningsangwaba aser JSS tir Imdongtanga nati molungnen o jembiba liasü.

Maneni sentong nung nungo kakat committee convenor Imotemjen Longchar-i nungo kakat lapoktsüba mapang agi, Dimapur Japukongtsür tamang telongjemi temeja ken ka aten aser tetsü oshi ken Dimapur Longjemdang Senso Telongjemi tena liasü.

Iba sentong nung Aloizükong balala nungi lenirtem aser Dimapur nung aliba Japukong nungertem aika adenshia kanga meraketa mungogo.

NSLSA-i ayonga National Legal Services Day mungogo



Kohima, Yimpoksüi/ November 9 (TYO): Nagaland State Legal Services Authority (NSLSA)-i ayongzüka November 9 nü district balala nung National Legal Services Day mungogo.

NSLSA Member Secretary, Neiko Akami, NJS-i, Phek kübok Losami yimtsüng nung ojembiba mapang Legal services ya lokti nung tekübokba jenjang nung aliba nüburttem nem angati aser tetangshi service agütsütsü atema state-i aruogo ta ashi.

Paisa, Legal Services ya rongsenketzüng nung tashi maitba mesüra tanga mata mabensaba ajanga lisopurtem tangutsü tima obendang manguba melidaktsütsü atema lir ta ashi.

Akami-i, sentepa aliba lokti dang Legal Services Authority

den tongteprateptsü aser tarutsü nung nisung mashi kati Legal dak sendakba nung ken o ashishitetsü ta ashiba den legal service ya angati agütsür ta ashi.

Shisalen sayur Panel Lawyer Sekhotso Rokha-i, Nagaland Village Council Act aser NDPS Act aser Retainer Lawyer Vethothi Vero-i Nagaland Victim Compensation aser POCSSO Act indang jembiba liasü.

Kasa anogo Longleng DLSA-ia National Legal Services Day nüngdem nung Shamakok Mission School, Good Shepherd School aser Christian High School LLCs den Legal Awareness cum Educational Tour sentong ka ayongzüka agiogo.

Sentong nung Mane Phom, Retainer Lawyer-i iba anogo

amungba indang metetdaksüba den temzüng ozüng indang tatsü agi lemsatapa liasü.

Tuensang District Legal Services Authority-i ayongzüka Honibarnü Goodwill Society Drug De -Addiction centre, Tuensang nung National Legal Services Day mungogo.

Sentong nung Retainer Lawyer TDLSA Antimangyang Chang-i, NDPS Act indang aser Panel Lawyer Herola-i Legal Services aser angati legal teyari indang lemsatapa liasü.

Kasa mapang nung Dimapur nunga Dimapur District Legal Services Authority aser Christian Institute of Health Sciences & Research na longjemer National Legal Services Day ayongzüka mungogo. Iba sentong ya "Empowering Access to Justice" omen nung ajemdaker agia liasü.

Sentong nung Panel lawyer Sangto Longchar-i, iba anogo amungba indang lemsatapa den legal services, iba indang shilem, lok adalat, victim compensation scheme aser Pocco act indang lemstep. Chief Legal Aid Defense Counsel L. Luzukhu Achumi-i FIR, procedures on bail & bonds, basic legal rights, domestic violence aser BNSS indang jembiba liasü.

Maneni Wokha District Legal Services Authority aser Peren District Legal Services Authority nati ayongzüka pei district nung National Legal Services Day nüngdem nung sentong balala ayongzüka agiogo.

Home department-i metetdaksür

Dimapur, Yimpoksüi/ November 9 (TYO): Home Department-i November 9 nü sangdong ka ajanga, Frontier Nagaland Territory/Frontier Nagaland Territorial Authority atema Draft Memorandum of Settlement-III dak sendakba nung Ministry of Home Affairs, Government of India nem osang agütsüogo, ta metetdaksü.

Shiti ya November 6 nü Secretary, Ministry of Home

Affairs, Government of India nem agütsüogo, ta kasa sangdong ajanga metetdaksü.

Departmenti-isa, Frontier Nagaland Territory/Frontier Nagaland Territorial Authority atema benoka aliba nung Eastern Nagaland kübok aliba Mon, Tuensang, Longleng, Kiphire, Noklak aser Shamator district tem densema lir koba State Cabinet-i October 30, 2024 nü senden amenba mapang agizükogo, ta ashi.

Ochi atema nokdaksü mapang tongogo: Imkong L Imchen



Ongpangkong Telongjem biennial general conference nung Advisor, Imkong L. Imchen-i o jembiba mapang tangokba noksa nung angur.

Dimapur, Yimpoksüi/ November 9 (TYO): November 9 nü Kohima Ongpangkong Telongjem biennial general conference nung o jembiba mapang Advisor for Information & Public Relations, Imkong L. Imchen-i, Aoertem tasü ita ochi asoshi nokdaksü mapang tongogo ta ashi.

Iba sentong ya Molu Ki, Kohima nung agia liasü.

Advisor-isa, tang yimden yimsüsüba jenjang reprangdangra Aoertem tsüba ajema ajema repranga atar ka mekümi tejakdangi arua tanga kintem den jangyumedema ken o bentettsü atema tongtibang shilem agitsü mapang tongogo, ta ashi.

Paisa, Ongpangkong nungertem dang puti otsü dak ajemdaker Aoer tem rongnung tambu ama lensayur ka ama shilem agitsü ajungshia liasü.

Imchen-isa, taoba Nagaland Chief Minister kanga sapuba aser akümtsüba lemsatop, shiba ochi atema masetshi-i nokdakogogo aser Naga nunger ajungtsü atema pa tebilemba

tetsüba makai jembio, ta ashi. Sentong nung tongti o jembir Tongpok Pongener-i, 'the role and responsibility of a microcosm for community upliftment' onük nung ajemdaker jembiba liasü.

Kasa mapang nung Kohima Ongpangkong Telongjem tir mapa toktsüasang Alemkumzük-i tepila o jembiba mapang, küm ana takok nung tembangba atema külem tenzükertem dang kanga pelaba lemsatop aser ashiba agi, Ongpangkong nunger tenzüksü ya maangka aser tetushi ulura liasü.

Paisa, Aoertem dang temaba jenjang tongtettsü atema meranga inyaktü aser yimden yimsüsüba tsütsü Aoertem rongnungi ochishir aser tetemsü lenirtem adokdaksütsü atema inyakyim meshidakbatem ajak intoktsü ayongzüka liasü.

Kohima Ongpangkong Telongjem biennial general nung Kohima nung aliba Ongpangkong nunger züngsemtemi shilem agi, kong onük balala benoka sensaksema liasü. Tir Kilangchuba-i anir mendenpur tasentem 2025-2026 küm atema iba senden nung shimogo.

Exec Engineer transmission division Kohima-i metetdaksür

Dimapur, Yimpoksüi/ November 9 (TYO): Executive Engineer Transmission Division Kohima-i sangdong ka ajanga, power supply kecha tetsükdaktsü makai agütsütsü atema Kohima Transmission Division kübok 132kV Doyang-Sanis Line aser 132kV Sanis-Wokha Transmission line mesanga aliba kübok aremtem November 12 nü merektetsü ta metetdaksüogo.

Iba dak sendakba nung teküboklen agüja aliba tesentem nung temalen shisema aliba anogo nung anepdang 8 ako nungi nikongtsütsü 3 ako tashi power shibanga atatsü, ta kasa sangdong ajanga metetdaksüogo.

Anungji iba inyakyim ajanga kongshitsü aliba consumer aser nüburttem dang teka amteper inyaktü aser power magütsüba aremzüka atatsü mepeshia metetdaksüogo.



November 09, 2024 nü Sehere district nung Madhya Pradesh Chief Minister, Mohan Yadav aser BJP candidate Ramakant Bhargava nati Budhni Assembly Constituency by election atema nüboyindang tangokba noksa nung angur.

Telangana nung Congress sorkari caste survey tenzükogo

New Delhi, Yimpoksüi/ November 09 (Agencies): Honibarnü Congress party nung lenir, Jairam Ramesh-i, tanü Telangana nung Congress sorkari caste survey tenzükog, aser iba ya state atema puti otsü asütsüsa mapang ka lir, ta metetdaksü.

Jairam Ramesh-i X ajanga, "Telangana nung Congress sorkari tanü caste survey tenzüksü. Taruba hopta ishika tsüngda enumerators 80,000-i kibok nungi kibok semdanga district 33 kübok kibong crore 1.17 ayimjemtsü," ta metetdaksü.

"1931 küm sülenbo tang mezüng Telangana nung state sorkari caste survey agir asütsü. Iba ya puti otsü ka asütsü aser temelenshi tulu alitsü. Iba ya 'Telangana Movement' aser Dr Babasaheb Ambedkar indang Temzüng nung aliba tangatbatem rongnung ka

ataloker asütsü," ta Jairam Ramesh-i metetdaksü.

"Iba ya, tan hopta tetenzüklen Hyderabad nung Rahul Gandhi-i jembiba ama INDIA teloktep sorkari agitsü aliba national caste census indang blueprint asütsü. Iba census den külemi Supreme Court-i Scheduled Castes, Scheduled Tribes aser Other Backward Classes atema reservations ceiling shilem 50 latettsüba ya linük atema @INCIndia mangdang asütsü," ta Congress lenirisa metetdaksü.

"Asen linük temzüng nung aliba aser India tenteter tsüraburtemi ayuba mangdang ama onoki India nung loktiliba, yimtenren aser rongsenkettzüng tsütsü kasa temeden atema inyaksü," ta Jairam Ramesh-i metetdaksü.

Mongolbarnü caste census atema ayongzükbä senden nung

adentsü atema Congress lenir Rahul Gandhi Bowenpally-i oa liasü.

Caste census atema Telangana State-Level Consultations sendenji Gandhian Ideology Centre nung amen aser iba senden nungji Congress lenir Dr Kota Neelima-i okila jembia liasü.

Kasa senden nung Telangana nung Minister Ponnam Prabhakar-i caste survey indang osang tejangja metetdaksü.

Taoba ita Prabhakar-i, November 6 nungi tenzükä November 30 tashi Telangana nung caste survey agitsü, ta metetdakja liasü.

"Telangana nung November 6 nungi November 30 tashi caste census agitsü. Onoki iba ya election mapang nung nangzüka liasü aser tang atangji ataloktsür," ta Congress lenir Prabhakar-i metetdakja liasü.

Sanjiv Khanna-i ita 6 dang Chief Justice inyaksü

New Delhi, November 09 (Agencies): Chief Justice of India (CJI), D Y Chandrachud November 10 nü menden nungi anisüngzükbä sülen senior-most Supreme Court (SC) judge, Justice Sanjiv Khanna-i pa melenzüksü.

November 11 nü Justice Khanna-i CJI tenangzükbä agitsü saka pa kümsük ita 6 dang asütsü, kechiyong pa sangküm May 13 nü anisüngzüksü.

2019 küm January 18 nungi

Khanna SC nung judge inyaker. Pa kanga tongtibang Constitution Bench aika nung züngsema liasü.

Electoral bonds scheme agienba, Arrla 370 dak sendakba obendang aser taoba mapang Delhi deputy chief minister Manish Sisodia nem bail agütsüba benches nung pa densema liasü.

Supreme Court Observer ajanga ashiba agi, obendang 117 agütsüba nung Justice Khanna-

i shilem agia liasü aser tang tashi nung benches 456 nung pa züngsema liasü.

Khanna ya 1960 küm May 14 nü aso. Pa Campus Law Centre, Delhi University nung law azüng aser 1983 küm Bar Council of Delhi nung advocate mezüng inyaka liasü.

2005 küm pa Delhi High Court nung additional judge shim aser tang National Legal Services Authority nunga executive chairman teinyakdak.

Punjab aser Haryana tesem aika nung mopung kanga menenogo

Chandigarh, November 09 (Agencies): Honibarnü Punjab aser Haryana tesem aika nung mopung quality 'poor' category nung liasü aser state anaprongla yimtiba, Chandigarh nungbo Air Quality Index (AQI) level ji 322 liasü, aser ibajibo 'very poor' category nung lir.

Central Pollution Control Board indang Sameer App ajanga sayuba agi, Haryana kübok Bahadugarh nung Air Quality Index level 314 liasü, aser ibajia 'very poor' category nung lir.

Haryana kübok Sonipat nung AQI 290 liasü, Hisar nung 285, Bhiwani nung 277, Jind nung 275, Charkhi Dadri nung 258, Gurugram nung 259, Faridabad nung 220, Yamunanagar nung

213, Rohtak nung 238, Kurukshetra nung 202, Kaithal nung 205, Fatehabad nung 198, Ambala nung 160, Sirsa nung 181 aser Karnal nung 144 liasü.

Punjab nunga Mandi Gobindgarh nung AQI level 264 liasü, Amritsar nung 258, Rupnagar nung 257, Jalandhar nung 248, Ludhiana nung 197, Bathinda nung 183, Khanna nung 176 aser Patiala nung 133 liasü.

Asükwa mongpu mapang Punjab aser Haryana na den Delhi nung mopung kanga menena akümbaji talisa alu nung jana arongba agi lir.

Hokolbarnüa Punjab nung alu nung tesem 730 nung jana arong, aser ibaji densemabo tan mongpu nung alu nung jana arongba ajak senteper 6,029 lir.



November 09, 2024 nü Bengaluru nung Union Finance Minister Nirmala Sitharaman-i M/s Sai Ram Engineering semdangba mapang tangokba noksa nung angur.

BJP ali tashibo minorities-i reservation mangutsü: Amit Shah

New Delhi, November 09 (Agencies): India nung Bharatiya Janata Party (BJP) ali tashibo yimsü nung ajemdaker minorities-i reservation mangutsü, ta Honibarnü Union home minister Amit Shah-i metetdaksü.

Honibarnü Congress lenir Rahul Gandhi-i Muslim nungertem nem reservations agütsütsü, ta jembiba sülen Shah-i iba o ya jembia liasü.

Jharkhand kübok Palamu nung election nüboyim sentong ka nung jembidang Amit Shah-i, yimsü nung ajemdaker reservations agütsü nungbo Dalits aser tribal nisungtem koma asütsü?, ta metetdakja liasü.

Shah-i, "Congress party-i reservation indang jembir. Linük temzüng nung yimsü nung ajemdaker reservation agütsütsü atema shia mali. Yimsü kar nung ajemdaker onoki reservation agütsütsü makok. Maharashtra nung Ulemas telok kati shidi ka ajanga parnok (Congress) dang Muslim nung nem reservation shilem 10 agütsütsüla, ta mepishi aser state Congress Tiri, iba atemaji onoki yaritsü ta ashi," ta metetdaksü.

"Jharkhand nung alirtem dang ya asüngdangtsü atema ni yagi aru- Muslim nung nem reservation shilem 10 agütsüra shirnok indang reservation ajemtsütsü? Backward classes,

Dalits aser tribal nisungtem indang reservation ajemtsüsa akümtsü. Yang nungi ni Rahul Gandhi dang ya ashir. Rahul Baba, nü melungjang nung kechi asalentong lider liaka BJP ali tashibo iba linük nung minorities-i reservation mangutsü," ta paisa metetdaksü.

Shah-i, "Congress party ya OBC (Other Backward Classes) anemba party ka lir. Kodang parnok sorkar nung lider parnoki OBCs nem temeden magütsür. Kaka Kalelkar committee 1950 küm tentet saka parnok indang report sama. Mandal Commission-i OBCs nem reservation agütsü saka Indira Gandhi aser Rajiv Gandhi nati ibaji anema nokdak. Central institutions nung OBCs nem reservation shilem 27 agütsütsü atema parnoki küm aika agiogo. 2014 küm nüburtemi Modi sorkar shimba sülen pai OBCs nem reservation shilem 27 agütsü. Pai National Commission for Backward Classes (NCBC) tentet aser ibaji linük temzüng nung benok," ta metetdaksü.

Amit Shah-isa, "State nung BJP sorkar tentettsü atema mepishitsü asoshi onok yagi aru, kechiyong tang aliba state sorkar ya ochimashi nung pungoka lir. JMM, Congress aser RJD sorkar ya linük nung ochimeshitiba sorkar lir," ta aitsü.



Jammu, November 09, 2024: Tawa Jammu & Kashmir nung kiralongra tatalokba balala anema Honibarnü Jammu nung kaketshirtemi longkak aيتدang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, NOVEMBER (YIMPOKSÜI) 10, 2024

Putepdaksüba jenjang

Tsüngremi alima nung alitsü nisung yanglu aser longso-longsoa jangratema alitsü asoshi soyapokdaksü. Ajisüaka, item nisungtem jagi Tsüngremi ashiba manga temenen menaba ajanga Tsüngrem o nisungtem na tsüngda meputep aküm. Aji oda, nisungtem temenen agi Tsüngrem nungi piladaksü aser parnoki parnok yanglusang amadok nungji, Tsüngrem kanga jashia liasü. Iba ama tia ka nung alijak nungi ano meimchirtem samatsü lia, Laishibai ashir, "Tsüngremi alima kanga meim nung, Pai pa ajaso chir ka dang aliba meimchir temenen pongitsü asoshi angati agütsü, anungji shirnoki Pa dak amangdir kodanga mesamatsü saka teti taküm angutsü." Tetezü, Tsüngrem o meimchirtem na tsüngda meputepteti aliba Yisu Khrista alimai aruba ajanga putepshidaksü. Alima nung meimchir taküm yimya, achiajem aser sobaliba ajunga tesempatsüka liasü. Aji oda, meimchirtemi Tsüngremi aginütsüsa kecha meinyak, ajisüaka Yisu Khrista nisung kümer alimai aru aser timtema kangki nung Pa taküm bendanga agütsüba ajanga meimchirtem temenen taidok angu. Tetezü meputepi aliba putepdaksütsü asoshi inyakba maparen nung nisung kar mapang, rongsen aser taküm bendanga agütsütsü nungdaker. Meputepi aliba puteptsüba jenjang (price)-ji tasak. Odangbo meputeptetsü. Puteptsü atema kari aremzüksüla, takoksa, timtem aser maksü aremstsüla. Aji oda, meputepi aliba puteptsü atema taidok agütsüteptsü nungdak adoker. Item timtem khuret ajakji Yisu Khristai aben nungji asenokbo Tsüngrem den ano tesendaktep tajungba yanglutsüogo. Yisu Khrista tenüng maneni sangdi. Joko, asenok dang Yisu Khristai inyaktsü ashiba tongtibang mapa kaji, "ni kechi koma nenok meim, yamaji nenok rongnunga kati ka den meimtepang," ta ashiba o ya asütsü. Aji oda, asenok ya Yisu Khristai tenyaba mapa inyakertem lir. Asenok ya Tsüngremer osangbenertem aser yimjung yanglurtem asütsüla. Asenok tai temenen ajanga Tsüngrem den dang masü saka tangar dena meputeptetter. Iba jagi tanü asen lima ya meputep mesüra tsükchitep agi sünga lir. Asenok temenen ajanga kibong balalular, medemer aser kinüngertem rongnung meputep adoker aser arogo dena raksar. Temeneni asenok rongnung tenük merem aser mulung melemtep adokdaksür. Item meputeptetba temenen ajak madak takok angutsübaaji asenoki tama Tsüngrem den yimjung yanglu nung dang aser Pa den putepa ali nung dang akoktsü. Asenok mulung nungbo tangar sempar saka tebang agibo puteptsü jembir aser asenoki tangar nem taidok magütsütetter saka asenoki yimjung indang jembia senzür ta süra, ibajibo anemsü agi yimjung bushiba mapa ka asütsü. Iba jagi Tsüngrem mepeladaksütsü aser nisungtem putepdaksütsü makoktsü. Lashiba ajanga Tsüngremi asenok nem kanga inyakdaksünubaji tangar dang temeim sayutsüba ya lir. Tetezü, asenok tangar den putepa alitsü aser tangar o tangar na ta putepa alitsü merangdaksütsü. Johan 13:35 nung ashir, na Yisu dak amanger aser pa nüsünga ta tangari metettsübaaji nai tangar dang temeim mapa inyakba ajanga metettsü. Tsüngremi koda meim yamaji asenokia tangar dang meimtsübaaji dang Yisua aginer. Temeim agi dang taiadoker aser temeim agidang putepdaksür. Tangbo joko Tsüngremi asenok nem tangar putepdaksüba mapa inyaktsü nunglokja lir. (2 Kor.5:18). Anungji, asenokbo meputep adokdaksür masü putepdaksürtem asütsüla.

OLEMSABANG

ABAM ASER AROGO NUNG TETSÜR NEM TOKOLAK MENDN AGÜTSÜTSÜ MAPANG TONGOGO

- Wati Longchar

Patriarchy (tebur yimli yimsüsü) kübok Tetsür

Tanü koba asen lima yimtsüng aser arogo beshiba yimden yayim dang "patriarchy" - tebur yimsüsüba; tebur tekolak aser tebur dang senmang amangba, tebur dang sonsopur ta sayuba aser inyakba dangji ajar aser iba dang ya "social sin" ta ajar. Vandana Shiva-i iba patriarchy yayim ya "the most violent social structure" ta ashir. Tebur ta süra "aggressive, domineering" jakla nung aintsü sayur. Iba yayim nungi "Men are within power structure" aser "Women are outside of power structure", yongji tetsür ya yimden, senso nungi züngdoker, senmang magütsür, parnok shisatsü tajung, sempet tajung lokti, yimden aser arogo asoshi mamshitetsüsa tebur yimli inyakyim jagi kümdaksür. Tat. agi., tetsür ka IAS officer aser teububaji matric fail driver dang, saka kodang yimtsüng yimden ta asür, "she is outside of power structure, but he is within the power structure". Iba ya tanü putu den khenyongi mapet asünungji melenshitsu. Tanü putu arogo aser lokti tejakleni odaksünera shirnoki lokti meimer, ochishir, tashir aser temeteteri anidaksütsüla. Yisui, aser Tenyartem aser talisa Pauli ashiba ama Khrista nung tetsür aser tebur kecha tebandang mali (Gal.3:28), anungji ajak sadem sadema inyaktetsüsa arogoji alitsüla aser arogoi anir lokti telok balala nung temelenshi adokdaksütsüla.

Luk 18:1-8 nungji Yisui yimti ka nung amitsür ka aser Obendanger ka o-entepba indang shia angur. Obendangsang lai mepishiba manga, saka lai arujen arua mepishi nungji pai ashi "lai maneni dang aruba agi ni lakteter" (Lk. 18:5). Tetsüi parnok right indang jembira, tanü kecha hau ta mali aser züdoker. "Power structure" nung aliri tangar den "power share" mesünütsü, anungji manganütsü. Tetsürtem aika qualified süa liaka, teburtemi tetsür aniokbaji parnok menden atsüngdoker amai bilemstsü aser nungdak makaba o, tetsür tashi maitba kuli kar shia magütsütsü jembitsü. Tanü asen arogo aser lokti patriarchy-i arakmoka yua lir nung koda sür tetsürtemi tasü ita aser takok ngua inyaktetsü! Nisung aikati iba Lai ratetsübaaji amitsürla ama maneni sarasademra Obendanger amaji Tsüngremi langzüksü ta sayutsüngir. Taseen Lai ratetsür Revelation Velunta-i ashir, iba o-entepba ya sarasadem indang ashir masü, mesüra Obendangsang ya Tsüngrem amai ashira masü. Ya tebur yimsüsüba (patriarchy) temenen anema ochiba mangu tashi tasü ita noktakba indang ashir. Yihuda nung sobaliba nung tetsür nem yimli, senmang, tamangbaren tashi magütsü. Talisa amitsür jenjang tebüboktiba nung yutsü aser jendok. Anungji Yihuda nung sobaliba temelenshi asoshi amitsürlai noktak. Naga/Aortsür aika dang tebur telolak yimsüsüba kübok putu aika dang mekütmeseni amshia aruogo, tat.agi, palaluya mapang senmang tim magütsüba, tebur agi mesosemra palaba, mesüra yimden yimli nung shilem magütsüba lir aser itemji anema amitsürla ama noktaksü nungdaker.

Sobaliba teti melenshir

Sobaliba kodanga memelenshir aser memelenshitsu tebur aikati bilemer aser nokdaker; saka iba tangatetbaji tai. Sobaliba ya meimchiri tensa den apet yanglur, aser meimchiri beshir, anungji sobaliba nungji tajunga tamajunga lir aser aji teti melenshia putu mopung isab nung yanglushia aor. Talisa kodangsa tangar nübür telok ka den libaliroa aotsüsa kümdir, tat. agi, Naga nung kin balala den Ao lima atena oa meyoktepa alitsüsa kümdir Aori latetba tzüzüng-ozüngji aser libaliro yimya kisüngi tangar alentsü makok, anungji melenshitsu akümer. American Baptist Missionary-i Khristan tamang yimsü bener arua amangdaksüba ajanga tetsü-tebou tamang yimsü samaa ao. Tanüa Information Technology ajanga sobaliba maparen nung temelenshi tulu bener arutsüdagi. Kanga dang kara aoba temelenshi lima ka nung alir, anungji Aor sobaliba nungi tetsür nem yimli agüja maru, anungji magütsütsü ta asübaji tai lir.

Akhidang tetsür yimsüsüba teloklak menden nung angur. Tanü IAS, NCS officer, Directors, Secretary, Principals, Professors aika dang lir aser parnok lenisüba tetuyuba kübok lokti ainer. Tanü putu nung yimden lenir tetsür aika Indira Gandhi, Meyawati Sukarnoputri ama, aser Germany nung Chancellor, Taiwan nung President, New Zealand nung Prime Minister ama yimsüsür tetemsü indang jembir. Anungji lanurtemi tetsür nem yimden-yimli nung tebur den kasa shilem agütsütsü tim ta ola adoktsü mapang tongogo.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir

Armenian-Iranian pastor ka kum ka sülen tepuokdak nungi chiokogo



Pastor Anooshavan Avedian aser Mehdi "Yasser" Akbari na noksa nung angur.

November 09, 2024: Iran nung Armenian-Iranian nung pastor ka kum 10 tepuokdak ayutsü obendang agüja liasü saka tepuokdak kum ka dang abensaba sülen chiokogo, ta International Christian Concern (ICC)-i metetdaksü.

Pastor tepuokdak ayuba anema aikati ola adokba sülen ketdangsertemi pastor Anooshavan Avedian Tehran yimti nung aliba Evin Jail nungi chiok.

Yaküm September 18 nü Pastor Anooshavan Avedian jail nung puoka liasü, ajisüaka taküm September 24, 2024 nü pa jail nungi chiokogo.

International Christian Concern, Voice of the Martyrs, Open Doors, Middle East Concern, Article 18 aser Barnabas Aid teloktemi pastor chiokang, ta takhangba agüja liasü.

2020 kum August 21 nü Iran

ketdangser 30-i pastor Avedian'er ki mita aoba mapang nung pa apu. Iba mapang nungji pa den Khristan telok ka sarasadamba den külemi pai parnok den Yisu Khrista indang lemsatapa liasü.

Ketdangsertemi Laishiba aser phone ajak meshizük aser parnok indang phone password asüngdanga liasü.

Pastor Avedian-i linük security raksatsütsü tebilemba nung ozüing alema telok ka lenir aser Islam yimsü indang temeshi kaket aitsür, ta ketdangsertemi pa nem tai tonglokja liasü.

Iran nung Sharia ozüing lir aser Islam ainkar Muhammad mezüingmeshirtem nem tasüba temerenshi obendang agütsür.

Ano tanga osang ka nung, 2019 kum Iran nung Khristan, Mehdi "Yasser" Akbari pua liasü aser pa kum pezü ser ita pongu tepuokdak ayuba sülen

taküm September 29 nü chiokogo.

U.S. Secretary of State-i Iran ya Country of Particular Concern (CPC) list nung züngokogo. Iba linük nung ketdangsertemi Khristantem anema inyaker, talisa Islam yimsü toktsür Khrista agizükertem anema inyaker.

United States Commission on International Religious Freedom (USCIRF)-i ashiba agi, Iran nung Islam yimsü toktsür Khristan yimsü agizükertem kanga reshikangshir.

"Islam yimsü toktsür Khristan yimsü agizükertem apur aser Khristan yimsü dak sendakba inyaksangshi kecha masütsü nangükdaksür mesüra Islamic re-education sessions nung adentsü tuyur," ta 2023 kum USCIRF report ajanga metetdakja liasü.

Indonesia nung kiojen ka Tenla ki ama amshitsü mepishiba magizük

November 09, 2024: Indonesia nung Cirebon yimti kübok Pegambiran yim dak Khristantemi kiojen ka Tenla ki ama amshitsü mepishiba yimdaklirtemi magizük.

Yimdaklir, Aris Munanto densema nisung aikati yim dak Arogoji ashishir.

"Iba kiojenji mezüingbo osettsüset ayutsü atema 'para' agüja liasü, ajisüaka ajungbena parnoki tekülem ki ama amshiner," ta Munanto-i ashi.

Paisa, "Ketdangsertemi

license agütsüba inyakyimji teladak masü aser shingaija jelia yimdaklirtem dang temelaba memeshi mesüra yimdaklirtemia temelaba magütsü," ta metetdaksü.

Osettsüset ayuba building ji Khristantem tekülem ki asütsü mepishiba anema yimdaklirtemi Lemahwungkuk district office anasa banner ka meyanga ayu, ajisüaka tangbo banner ji agienadokogo.

Lemahwungkuk district nung lenir, Adam Wallesa-i, par

party-i iba dak sendakba ken o jembia bentettsü atema telok ajak ayongdentsü merangogo, ta metetdaksü.

"Iba building ji tekülem ki ama amshitsü mepishiba dak sendakba nung mangatettep adokba sülen Lemahwungkuk district nung yimsü balala amangertem ajak tesünep nung alitsü atema onoki inyak. Ajisüaka yimdaklir aikati iba kiojenji tekülem ki ama amshidaksütsü memelunger," ta paisa metetdaksü.

Chhattisgarh state nung lokti tulu kati Khristan 14 dak azük

November 09, 2024: October 30, 2024 nü Chhattisgarh state nung lokti tulu kati Khristan 14 dak azük, saka police-i repranga dang toktsü, ta International Christian Concern (ICC)-i metetdaksü.

Khristantem dang Khristan yimsü tokjang ta tuyu, saka parnoki tashi mangaba den külemi alu aruhba agi lokti jagi parnok dak azük.

Tetsür ana densema Khristan 14 dak süng agi azükba ajanga parnok aika tekolak yiru aser karbo teret sükdanga liasü. Lokti jagisa Khristantem

meyong ki bendoktsü aser alu nungi züsentetba tsük rongdoktsü.

Police katibo Khristantemji yaritsü merang saka pa-a yiru.

Iba ya Chhattisgarh state kübok Dantewada district nung atalok.

Iba tesem nung aliba tribal nütsüngtem dang Adivasis ajar. Parnok ya yimjung meimertem lir, ajisüaka parnoki Khristan yimsü dangi meyipertem anemabo inyaker.

Yangji aliba Hindu nungertemi mapang shia tribal nütsüngtem ajungshia

Khristantem anema inyaker.

June ita nunga kasa district nung Hindu nungertemi Khristan tetsür ka tepseta liasü.

Khristantem dak azükdang police-i repranga dang yutsüba aija Khristantem temeden atema inyaker, Nagesh Michai, kechiba police-i tim teinyaktsü meinyaker?, ta asüngdang.

"Police-i temeden balala wazüka ayutsüla, ajisüaka parnoki repranga lia nisung 14 dak azük. Iba tetezü temaba ketdangsertemia loktiji pusemer," ta Michai-i metetdaksü.

ANOGO ABEN TSÜNGREM DEN

Khristan Tekülem

Mathi 4:1-11

Yihuda nung yimsü nung lenir tulu kati Yihuda nung aser khristantem kasa tekülem nung tajangzük anguba ajitetba ka yamai ashi: "Nisungi Tsüngrem indang bilema malitsü akok, saka Tsüngremi nisung atema kanga bilemstür". Ibai bushitettsü tatempangba lemanji tekülebaji lir kechiaser tekülebaji taküm aliba leman ka lir. Tsüngrem tesangwa nung alimaji anguba leman ka.

Koba yimya nung chichiba Khristan tekülem yimyaji sayur? Putu ajak nung, mapa ana maneni külemi alir. Itemji sayutsüngiba aser oji angashiba, aser Kibuba Benjung agiba. Parnok inyakba yimya balala süaka, ka jembir aser ka mapa agi sayur, saka itemji mapabo kasadang. Anapronglai Khristai alangzükba taochi osangtajung ain aser sentsüwangshi nung sangdonger.

Anungji ozüngji odang lir. "Nai Kibuba ne Tsüngrem külemang". Kechiba? Tekülemji Khristan kija takümi Tsüngrem yimli nung shilem agia adenba lir. O ka nung, yangi asen tekülemji, kotak nung külemba tashi mait ongmedang dang lir.

Itemi shisadangang: Tang nai Tsüngrem mebilemer mesüra shinga mebilemer ta bilemer asü? Iba tebilemstü aneptsü asoshi nai kechi merangdang? Tembarten den jembir asü? Counselors den jembir asü? Tsüngrem den jembitsü koda? Ne taküm nung tekülem nem mapang agüja ali asü mali?

Sarasadem: Kü tanela nok nungi kümzükang, kü taküm azü tashi nungi kümzükang. Molusongzü bang nungi kümzükang; arem nashi pungchi nungi Nai kümzükang.

Telangzüba: Aser tesüneptsüba Tsüngremi nenok tetsüng kübok Satan ajemshitsü.

Fulani Muslim teloki Kaduna state nung Khristantem aika puer ao

Abuja, November 09

Taküm May 19 nü Fulani (Agencies): Taoba hopta teloki Kaduna state kübok Fulani teloki north-central Kachia County kübok Mai-Nigeria nung Khristan nütsüng Goro yim amakba sülen teimba aliba yim ana amak.

Kaduna state kübok Khristan nütsüng aika aliba yim ana- Mai-Iddo aser Arikon na amakba sülen Fulani teloki tetsür ka densema Khristan pezü puer ao.

Osangbener den jembidang yimdaklir, Festus Audu-i, "November 1 nikongdang 5:00 ako meta auertemi (Fulani telok) raraba hadir bener arua yim amak aser Khristan pezü puer ao. Khristantemji alu wadang teinyakdak liasü. Tesüiba ita ana tsüngda tang agi tanabenbuba Mai-Iddo yim amaker," ta metetdaksü.

October 17 nü Fulani Muslim teloki Mai-Iddo yim amakba sülen Khristan tetsür pezü den tanur ka puer ao, ta paisa metetdaksü.

Taküm April 14 nü Fulani teloki kasa state kübok Bishini yim amak aser Khristan pongu puer ao, ta yimdaklir Abraham Bishini-i metetdaksü.

Bishini-isa, "Fulani telok jagi Khristantemji chioktsü atema parnok nem naira sen million 15 agüjang ta takhangba agütsüogo," ta metetdaksü.

April 3 nü Kaduna state kübok Goshe yimdak Fulani teloki Khristan ka khaset aser Khristan 13 puer oa liasü, ta iba tesem nungji alir Musa Bala-i metetdaksü.

Kasa anogo nungjisa Fulani teloki Badeko yim amakba sülen Khristan 10 puer ao, ta paisa metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG

Tarokok

(adv) taküm melenshitsüba timtem tia (life changing difficult situation)

* Ni sen asaya tenzükbaji tarokok mapa ka liasü.

Tartasen

(n) yimkong mapai aoba mapang (time to go for work)

* Yimer tatartasen mapang shinga mejanga mekazütsüla.



OLONG PAITEP # 6977

15x15 crossword grid with numbers 1-19.

TIPLÉN

- 2. Teburtemi tejak nung awaba - (8)
6. T ___ em - (3)
8. Tzüik ayudak - (3)
9. Nüngdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6976 TELANGZÜBA

TIPLÉN :

- 1. Chisang, 4. Ket, 7. Odi, 8. Nangri, 10. Angur,, 11. Aiben, 17. Temeim, 18. Lah, 19. Moa, 20. Takdang.

LANGTSÜNGLEN :

- 2. Indang, 3. Nüngo, 5. Tain, 6. Ana, 9. Ama, 12. Balala, 13. Nao, 14. Sempa, 15. Atem, 16. Ken.



AROGO NUNG TENZÜKER TEJEN TASEN MELENTEPBA MONGPU.

Mendenbuba : Taküm mongdangyabo aki ama mesüi mongdangsangeridang tenzüker tasentem ya shimdi, anungji ministry ajak nung aser sannükera dena bushitsü lir taji tenzüknertemi pei sasa nokdaka shitepang ?

Wainba : Nia tenzüker rongnung dener tangari kü sempet ya ngudaktsüner, anungji nia tenzüker rongnung shimangma,

Meruba : Ait, nia tenzüker tongtika kümer Arogo devolopment ajakji kü incharge nung inaktsü jangrar, anungji nia shimangma,

Konangba : Hai! Arogo tenzüker rongnung ya ozü tsükongpurbo kadanga dena mangur , anungji tsükongpur aser ozü yimer tenungnung nia shimangma,

Meochiba : Sannüker postji azüngteter süra onoka laishir tajungka lir, anungji ni sannüker mapa khurtji bendiko,saka Arogoi komsikom lakh ter tema jenjang garika alijangko, aser ki tajungtibaka azüngtetjangma,

Ochiba : Ni Tsüngremi melaba ama theology züngogo, anungji Arogoi molungra samabapur anitentsü asoshi tetsüng agi süaka meta talangi oa tenzüki .

Mendenbuba : O tenzüksüpurtem !!!!

Lilir : I, Kilang, Ajem ,Indisen, Dimapur.

Guwahati nung süngdong tsüngdoktsüba anema ait



Guwahati, November 9, 2024

(Agencies): Guwahati kübok Bharalumukh nung alirtemi Honibarnü süngdong tsüngdoker railway overbridge ka yanglutsüba sentong anema lungkak aitogo.

Iba tesem nung alir nisung 100 shi kati human chain ka yanglur lungkak ait. Teintet rogotem aser lanurtem dena placards amer aser yimyim ayima lungkak ait.

Railway Gate No. 5 anasa apu yanglutsüba nung süngdong aika tsüngdoktsü aser süngdongtemji Bharalumukh maitsü lir ta local citizens' coordination committee-i ashi

"Süngdongtem ya ozü tesem indang maitsü lir. Onok tanur asü dang Bharalu ayong ya temerük liasü aser süngdongtem ya putu aika tain lir. Süngdongtem tsüngdokba ajanga ozü senmang samatsütsü" ta teintet rogo kati ashi.

"Onoki terenlok anema menokdaker saka alima tobur ajung wazüka ayutsü atema tanga lenmang bushiteptsüla. Bharalumukh nung süngdongtem metsüngdoki apu yanglutsü lenmang alitsü" ta pai ashi.

Taoba ita Dighalipukhuri nunga süngdong tejentem tsüngdoktsüba sentong anema lungkak aita liasü. Iba ken o ya

Gauhati High Court-i aben aser okadaki state sorkar dangi tasüngdangba kar yoka liasü.

Assam Chief Minister Himanta Biswa Sarma-i tawa tu Dighalipukhuri semdang aser Public Works Department (PWD)-i süngdongtem tsüngdoktsü sentong mali ta ashi.

"Onoki süngdongtem metsüngdoktsü mesüra tangalen mebelentsü" ta pai ashi.

"Asenoki terenlok aginüra süngdong karbo tsüngdoktsüba akümtsü. Residential construction dena urban development maparen nung tesüiba mapang süngdong aika tsüngdokogo" ta CM Sarma-isa ashi.

Girijananda Chowdhury University nung Japan Carnival ayonga among

Guwahati, November 9, 2024

(Agencies): Assam nung Girijananda Chowdhury University (GCU)-i Hokolbar aser Honibar anogotem Japan Carnival 2024 ayonga agiogo.

Japan Foundation, New Delhi den yaritepa iba benjung ya Department of English and Foreign Languages ajanga ayongzük.

Japanese sobaliba benjungtsü aser India o Japan tsüngda tesentaktep akangshitsü atema benjung ayongzüka mongogo.

Anogo ananü carnival nung Japanese nunger libaliro, sobaliba saisapong, Yukata fashion, movie screenings, aser Cosplay shilemtem agia liasü.

Iba benjung nung adenertem dang Japanese oshi indang minilessons sayua liasü aser Japanese history, geography, o culture indang interactive quiz ka agi.

SSA Society president Jasoda Ranjan Das-i benjungmong lapoktsü aser pai Japan-i technological advancement aser cultural heritage liromedema

aruba atema tenüngsang agütsü.

GCU Vice-Chancellor Prof. Kandarpa Das-ia university ajanga Japan indang shisatsü agütsüba ashi aser tarutsü anogotem Japanese oshi nung BA aser MA courses tenzüksü sentong lemsatep.

Iba sentong nung Embassy of Japan Takashi Kobayashi aser Director General of the Japan Foundation Koji Sato na aden.

GCU-i Japanese oshi aser sobaliba ajungketba atema tenaprongi tenüngsang agütsü.

Assam Police-i taila sen Rs 60.58 lakh apu



Guwahati, November 9, 2024

(Agencies): Assam police-i Honibarnü nisung ka ket nung Fake Indian Currency Notes (FICN) aika bena aliba apu.

Guwahati, Assam kübok Betkuchi area nung inter-state bus terminal (ISBT) ka nung iba nisung apu.

Osang tejangja ka angazükba sülen ISBT police outpost nungi telok kati Hafiz Ali (27) apu. Iba nisung ya Dhemaji district kübok Sonapur nung alir aser tanep 5:00 ako nung pa apu ta Guwahati Commissioner of Police Diganta Barah-i ashi.

Police-i pa yangkhu mita

reprangdang Rs 500 note tejang 12,116 bena aliba angu aser ibaji Rs 60.58 lakh liasü, ta Barah-i ashi.

Police-i Hafiz Ali dang asüngdangya asü dang pai taila senji telok ka ket nung agütsütsüba liasü ta nangzük. Iba dak sendakba nung maneni bushisüngdang südar.

Pakistan: Quetta kübok railway station ka nung nisung 25 pokset

Islamabad, Yimpoksüi/ November 9 (Agencies): Pakistan kübok Balochistan province nung nisung aika mazüangi senzüa aliba railway station ka nung bomb apokba sülen nisung 25 asü aser nisung 40 dak tema yiruogo, ta police temi metetdaksü.

Honibarnü Balochistan yimtiba Quetta kübok railway station platform ka nung Peshawar-i aotsü atema train ak ata-a nisung 100 shi adenshia aliba mapang iba bomb poka liasü.

Senior Superintendent of Police Muhammad Baloch-i ashiba agi, asürtem rongnung sepaia 14, civilian pongu aser railway nung inyaker parnok trok densema liasü.

Pakistan nung province tem rongnung Balochistan province nung ya alirongsen aika lir saka iba ya ajak dang sensaktiba province ka lir, kong kiralongrartemi mapangshia tesem balala maka arudar. Iba province ya Afghanistan aser Iran na arrtsü nung lir.

Iba station amakba ya Balochistan Liberation Army (BLA)-i parnoki ta nangzükogo aser ashiba agi, pei temang nung bomb alenoker pokdaksürtem kari railway station nung sepaitem maka liasü.

BLA puri joko mapang talangka Islamabad dang nungi nüjiso meshia rara arudar. Pakistan nung sorkar den rara aliba telungpur telok aika rongnung BLA ya-a ka lir aser parnoki ashiba agi sorkari province nung aliba gas aser mineral resource tem mashiyimi amshir.



“2024 küm tetenzüklen nungi Balochistan nung aüztokshi lendong timba küma aoba ajangshia arudar. Security force tem kanga maka arudar,” ta osangbener Saadullah Akhter-i Al Jazeera dang ashi.

“Ajisüaka tang mezüngbuba Quetta teyongtsü makogo koba nisung aika asoshi taoksatsüka lir,” ta Akhter-isa shimsem.

Provincial sorkar otongdar Shahid Rind-i, iba tesem nung bomb pokdatsüba ya pei temang nung bomb alenoker pokdaksürtem mapa ama reprangtetogo, ajisüaka BLA-i kuli agütsüba jangjatsü atema bushisüngdang ka tenzükogo. BLA ya Pakistan, United Kingdom aser United States nung ajaki kiralongrar telok ka ta agizüker lir.

Security personnel temi lendong atalokba tesem nungi kuli tem maneni bushiba den bomb ya komaka sashia pokdaksü iba indang asadanga

liasü, ta Akhter-i ashi. Broadcast footage tem nung azü agi melangbanger aliba süoshitem platform nung merepshir aliba aser bomb apokba sülen sepaitemi iba tesem asadanga aser platform indang kilem pokshir aliba nguogo.

Ato Kilonser Shehbaz Sharif-i iba tatalokba ya aitsüogo aser ashiba agi, shirnoki iba tesem makogo parnok nem telangzüba tesashi agütsütsü. Paisa, kiralongrartem samatsütsü atema security force tem mulungteter lir ta shisem.

Iba province nung separatist movement azüoktsü atema sorkari military operation tenzükba sülen Baloch anemertem, meimchir temeden anema inyaksangshi tali kümogo, kong item nisungtem samaba, rishikangshiba aser extrajudicial killings tem densema lir.

August ita tesem balala

ishika amakba mapang nisung 39 tepset aser iba ya-a BLA puri parnoki inyak ta nangzükogo.

Telungpurtemi October ita Balochistan nung Dukki district kübok jurila nagmati atudak ka nung nagmati atur 20 tepset aser parnok tenet tashi yiruja liasü.

Taoba mapang telungpurtemi bendangertemi senotsü teyari agüja yangluba energy project balala makogo. Talisa China-i teyari agüja tang amenoka aliba project balala telungpurtemi nokdangtsü

merang arudar. Bendangertemi iba tesem nungi alirongsen ajak bener aoer aser iba tesem nung alirtem nem tajangzük magütsür ta item telok yagi shia arudar.

Pakistan nung China nung meyirejang aika mapa inyakdar. Parnok ya timba Beijing indang Belt and Road Initiative nung inyakerterem lir, koba multibillion-dollar infrastructure project ka lir.

Center for Research and Security Studies nung ken o asadanger Imtiaz Gul-i ashiba agi, iba tesem amakba ya Balochistan kübok tzüküm nung aliba yimti Gwadar dak sendaka lir, kong port authority complex ya China-Pakistan Economic Corridor (CPEC) infrastructure & investment project nung shilem ka lir.

“Iba ya commercial aser industrial port ka dang masü saka China nung atema kanga tongtibang rongnendak ka asütsü ta bendangertemi bilemer,” ta Gul-i Al Jazeera dang ashiba den telungpur telok aikati China nungertem minprongtsü aser maongka ngura amaktsü ta yimjak nung tenangzükba agütsüogo.

UNSC-i RSF general 2 nem tenokdangba agütsü

New York, Yimpoksüi/ November 9 (Agencies): United Nations Security Council committee-i, Sudan indang paramilitary Rapid Support Forces (RSF) nungi general ana nem tenokdangba agütsüogo.

Azütokshi lendong balala aser meimchir temeden anema inyaksangshia linük tamendakdak tashi meiti kümduksüba atema tena nem tenokdangba agütsüogo.

Sudan nung rara tenzükter UN-i tang mezüngbuba tenokdangb agütsüogo. Mohamed Hamdan “Hemedti” Dagalo-i aniba RSF aser Sudanese Armed Forces (SAF) tekolakba Abdel Fattah al-Burhan na tashi toktepba sülen April 15 nü rara tenzükba liasü.

UNSC indang Sudan sanctions committee-i Hokolbarnü, August ita tatemlen United States-i RSF indang head of operations, Osman Mohamed Hamid Mohamed, aser West Darfur commander Abdel Rahman Juma Barkalla na senzüsenpongtsü atema tenokdangba agütsütsü aser tena indang rongsentem mamshiteti kümduksütsü atem benokba agizüka liasü.

Diplomat temi ashiba agi, iba jenjang agitsü atema Russia-i

tenokdangba agütsüba ajanga menomeyanga liasü, kechiyong parnoki iba ken o kanga junga asadagnüa liasü, ta Reuters news agency-i ashi.

May ita US Treasury Department-i, Mohamed aser iba telok indang Central Darfur commander, Ali Yagoub Gibril na nem tenokdangba agüja liasü.

UN Secretary-General Antonio Guterres-i taoba hopta, RSF-i civilian tem amakba aitsüogo aser kasa mapang nung Britain-ia, iba rara dak sendakba nung UNSC bangzüng tejakdangi bener aotsü atema nongshitsü ta ashi.

Iba mangatetep ajanga nisung million 10 dak tema pei talidak ki toktsür jenshia aotsüsa kümogo, kong million 2.4 bo tanga linüki jena aoba densema lir. Iba ya global humanitarian crises tamajungtiba ta UN data ajanga sayuogo.

Nisung million 25 shi, teyari kanga nungdaka lir, kechiyong camp tem yawara agi menepogo.

Tang tashi nung iba rara nung nisung 20,000 tepsetogo aser UN agency balalai, health system chirepba aser poksen wara tali küma aoer asünung asürtem tang dang nungi kanga agi timba küma aotsü ta shiogo.

South Korea military-i GPS signal jam sütsüba atema North aitsü

Seoul, Yimpoksüi/ November 9 (Agencies): North Korea-i, Global Positioning System (GPS) jamming attack ka süogo, ta Seoul military-i ashi. Iba inyakyim ya tang benoka tinyakdak lir aser iba ajanga South Korea nung rong aser civilian tayimtsü tem aika dak kongshio.

South Korea indang Joint Chiefs of Staff (JCS)-i Honibarnü sangdong ka ajanga anüolen tzüyim nung inyaksangshia aliba rong aser tayimtsütem dang North Korea-i GPS signal jam sütsüba meita atatsü tekümdangtsü metetdaksüogo.

“North Korea-i yashi aser tanü (November 8-9) Haeju aser Kaesong nung GPS jam süja rongshio,” ta JCS-i ashiba den, iba inyakyimajanga rong aser civilian tayimtsütem aika minpronga arudar.

GPS ya satellites aser receiver tem network ka dak metaloker inyaksangshir aser iba ajanga global positioning aser navigation atema teyari

agütsür. JCS-isa, North Korea dang minprong tangsa tang anentsü aser inyakyim atema parnoki khuret abentsü ta tekümdangtsü metetdaksüogo.

May 29 aser June 2 tsünga North Korea-i minprongba ajanga tayimtsü noklang 500 aser rong aika GPS dak sendakba nung tebilemstü ajangshia liasü, ta iba mapang South sorkari ashi. Seoul-i United Nations aviation body; International Civil Aviation Organization (ICAO) nem tashishiba ka agütsü aser parnoki North Korea dang signal jam sütsüba anentsü metetdakja liasü.

South Korea indang Yonhap news agency-i Honibarnü sangdong ka ajanga ashiba agi, May aser June ita dang nungi tang signal nung minprong ya tashi maitba lir.

Iba inyakyim ajanga South Korea indang military operations aser hadirtem dakbo mekongshi, ta JCS-i ashiba Yonhap sangdong ajanga metetdaksü.

Pyongyang-i missile tendangba, North Korea-i North aser South na sendaktepba lenmang raksaba, tawa North nungi balloon nung jana bener yoka South Korea nung tsükdaksüba aser Ukraine rara nung shilem agitsü atema Russia-i North Korea nung sepaitem yokba indang osang adoker aliba mapang Korea linük ana tsünga tensa tamajungba kümogo.

South Korea-i Hokolbarnü Hyunmoo surface-to-surface short-range missile ka anüolen tzüyimleni khaketa yokogo, koba military-i ashiba agi, North Korea-i amokmerenba atema telangzüba tapet agütsütsü asoshi Seoul renema aliba sayutsü atema liasü.

Hyunmoo missile tem ya, linük indang Kill Chain’ preemptive strike capacity atema kanga tongibang lir aser iba ajanga North Korea-i parnok amakba temaitsü kar danga ngutetra meyiper amaktsü atema seoul nem tashi agütsütsü.

LAND FOR SALE	At Kushiabill, Dimapur. Area : 5 Puras
	Plot available as per budget
	Rate : Rs. 280/- per Sq.ft (Negotiable)
	Contact No : 7630996959

Capt N Kenguruse Tournament: Halcyon United SF-i iogo



Halcyon United aser Mavericks FC Mon na asayaba mapang tangokba noksa nung angur.

Kohima, Yimpoksüi/ November 9 (TYO): 8buba Capt N Kenguruse MVC Memorial Football Tournament nung Honibarnü tatembangbuba quarterfinal asaya Halcyon United Phek-i koka parnok semifinal-i iogo.

Iba asayamung ya Indian Army aser Assam Rifles nati ayongzüka tang Indira Gandhi Stadium, Kohima nung tasayadak lir.

Asayamung nung quarter final pezübuba kanga toktepa asayaba sülen Halcyon United-

i goal 3-2 agi Mavericks FC Mon kokogo.

Asaya nung Halcyon United nungi asayar Ngamminlun-i asaya tenzüker minute ka tsüingda mezüngbuba goal idaktsü, ajisüaka minute 23buba nung Bumang-ia Mavericks atema goal ka idakja goal kasasa aküm.

Asaya nung maneni Vebizo-i minute 40buba nung Halcyon atena tanabuba goal idakja asaya mezüngbuba shilem goal 2-1 nung tembanga liasü.

Asaya tanabuba shilem

tezüka sülen minute pezübuba nung Shurhosul-i Halcyon United atema goal asembuba idaktsü aser iba sülen minute 46buba nung Kevisanyu-i penalty ka ajanga Mavericks atema tanabuba goal idaktsü, saka parnoki goal tasembuba magütsüteti asaya Halcyon nem kokdaktsü.

November 11 nü semifinal asaya:

1. Halcyon United Phek vs Head Hunters FC @ 10am
2. Mez & Co FC Kohima vs Dynamo FC Dimapur @ 2pm.

India team Champions Trophy atema Pakistan-i maotsü

Yimpoksüi/November 9, 2024 (Agencies): India team taruba küm Champions Trophy cricket asayamung atema Pakistan-i maotsü. Board of Control for Cricket in India (BCCI)-i tawa Pakistan Cricket Board dang security dak sendakba nung tetsükdaktsü aliba ajanga iba telemtetba agiogo ta ashiba den India team-i asaya ajak Dubai nung asayatsü tejangraba aliba lemsatepogo.

Alima nung temaba jenjang nung aliba team ti taruba küm February ita 19 nungi March 9 nü tashi iba 50-over ICC asayamung nung shilem agitsü, koba Karachi, Lahore aser Rawalpindi nung asayatsü lir.

Sources-i ashiba agi, sorkar den sensak asema sülen BCCI-i Pakistan dak sendakba nung parnok tamendakdak metetdaktsüogo. Taoba küm Asia Cup masaya tsüingda Pakistan-i kanga nongshiaka India-i team asayatem Sri Lanka-i belener oteta liasü.

Taoba ita External Affairs Minister S Jaishankar aser

Pakistan Deputy Prime Minister aser Foreign Minister Muhammad Ishaq Dar nung Shanghai Cooperation Organisation senden amenba mapang ajurutepeba sülen linük ana tsüingda cricket asaya nung tetsükdaktsü aliba ya taoba mapang ama akümsü akok ta bilema aliba mapang ka nung tang iba olen lemsatepogo.

2015 küm sülen tang mezüngbuba linük ana tsüingda iba jenjang nung sensaksemogo.

Senden amenba sülen linük ana tsüingda cricket asaya tenzükhitsü atema sensak asemtsü ta imla liasü. PCB-ia arrtsü adena arua asayatsü asoshi India ajungmesotsü merangdanga arudar. Pakistan board-i, India team asaya tembanga sülen India-i meyipa aotsü atema-a benokdangogo.

Ajisüaka Jaishankar-i October 16 nü Pakistan semdangba sülen Jammu and Kashmir nung kiralongrartemi tesem balala aiben maka nisung 16 tashi tepsetogo, kong sepai ana densema liasü.

India team tatema 2006 küm Pakistan nung oa asayaogo. Iba mapang Rahul Dravid-i aniba team yagi iba ODI asayamung ya 4-1 agi koka liasü. Tawa Pakistan team linük nung England aser Bangladesh den asayaogo.

Harmanpreet-i Men's FIH Player of the year award nguogo



Yimpoksüi/November 9, 2024 (Agencies): India nung asayar Harmanpreet Singh-i, Men's FIH Player of the Year award aser PR Sreejesh-i Men's FIH Goalkeeper of the Year award nguogo.

Paris 2024 Olympics nung India team captain Harmanpreet Singh-i goal 10 idakja pai ajak dang goal timba idaktsü, kong quarterfinal aser semi-final nung goal idaktsüba aser Spain den bronze medal atema asayaba mapang goal anaprongla idaktsüba densema lir. Iba asaya ya India-i goal 2-1 agi koka Olympics anabuba atonga medal ngua liasü.

Tokyo 2020 Olympic Games nunga küm 41 sülen mezüngbuba medal anguba mapang Harmanpreet-i tongtibang shiem agia liasü. Pai 2020-21 aser 2021-22 season nunga FIH Player of the Year

award nguogo. Ajisüaka tetushi tasembuba ya sentiba asütsü ta bilemer, kechiyong pa lenisüba nung linük team asayaba mapang iba tetushi ya agizükogo. Pa lenisüba nung team-i Olympic medal ka ngua liasü.

Olympics nung anabenbuba atonga medal anguba sülen kidang benjungtepeba indang jembiba mapang Harmanpreet Singh-i, "mezüngbuba nung ni iba tetushi asoshi FIH dang kanga pelar. Olympics asayaba sülen kidangi meyipa aotsü jangrademtsüka liasü aser onok agizüksü atema nisung aika adenshir liasü. Ni kü team mate tema tetshiner, kechiyong nenok medeni iba ya tamakoktsü. Jenjang ajak nung takok angutsü atema maongka agütsüba asoshi Hockey India danga mejeta kanga pelar. Tanü kü kinungtsü aser jala-a

densema lir aser parnok matsüdang iba tetushi agüzükba ya ni atema ajak nung ajak. Iba tetushi angutsüba shirnokisa teyari agütsüogo nenok ajak dang kanga pelar," ta ashi.

Kasa mapang nung PR Sreejesh, Paris 2024 Olympics tembanga sülen asaya nungi anenogo. Olympics nung medal ana atonga anguba sülen tang pai FIH Goalkeeper of the Year award tasembuba nguogo. Pai iba tetushi ya 2020-21 aser 2021-22 season nunga agizükogo.

Sreejesh-i temaba jenjang nung asaya aliba mapang hockey asaya nungi anizüngzükogo. Taküm Olympic nung pai kanga junga asayaogo aser talisa quarterfinal nung Great Britain den asayaba mapang pai tongtibang shilem agiogo, kong India nungertem asaya mapang timba ka asayar 10-i dang asaya liasü.

Pa career nung teyari agütsürtem nem tenüngsang agütsüba mapang PR Sreejesh-i, "tanü ni kanga pelar. Kü career nung tatembangbuba tetushi asoshi kanga pelar. Ajaki meteta aliba ama Paris 2024 nung ni linük tenüng nungi tatembangsa asayaogo aser kümtem tsüingda Hockey India-i ni nongita yariba aser len aniba atema kanga pelar. Iba tetushi ya kü team meyong lir," ta ashi.

Mourinho nem asaya ka atema tenokdangba agütsü



Yimpoksüi/November 9, 2024 (Agencies): Fenerbahce-i Trabzonspor akokba asaya nung mebenshitsü yimya benshiba aser asaya dak sendakba nung pa tebilemba lemsatepeba atema Jose Mourinho nem asaya ka atema tenokdangba agütsüogo aser iba den senchi pound 15,000 shi chiogo.

Asaya nung mapang apuloktsür asayaba mapang Sofyan Amrabat-i goal ka idakja pai aniba team-i asaya goal 3-2 agi akokba asaya nung taoba mapang Chelsea aser Manchester United manager yagi tatembangbuba goal idaktsüba sülen ground nung temekok agi ajua aotsü meranga liasü.

Ajisüaka asaya tembanga sülen pai Turkey nung referee tem indang jenjang aitsüba aser asaya ketdangsurtemi tebandang maka inyaksangshi masüba atema ashishia liasü.

Turkish Football Federation sangdong ka ajanga ashiba agi, Mourinho-i jembiba o tem ya sportsmanship, asaya ethics aser fair play inyakyim anema lir aser iba ajanga linük nung football jenjang ajemtsüogo.

Parnokisa, taoba mapang Real Madrid aser Inter Milan coach-i jembiba o ya referee aser tanga asaya ketdangsurtemi tebandang maka inyaksangshiba anema lir aser iba ajanga parnok dak temulung melemteti kümdaktsür.

Mepetmesü agi sünger aliba asaya nung Trabzonspor team nem penalty ana tashi agütsüba atema Mourinho kanga mepelai liasü. Penalty anaprongla ya video assistant referee (VAR)-i asadanga sülen agüja liasü.

Paisa, Amrabat-i mapang apuloktsür asayaba mapang tatembangbuba goal midaktsü tsüingda par team penalty ka ngur alitsüba liasü ta bilemba lemsatepe liasü.

BILEMDANGANG
"Nü tebilemdangba melenshiang süra nü yimya melenshitsü."